

Reaccion di directiva di Fundacion Hadicurari

Publicacion mal intencional ta purba hinca proyecto di Clubhuis den esfera politico

ORANJESTAD - Pa medio di e comunicado aki Fundacion Centro di Pesca Hadicurari (FCPH) ta desea di reacciona riba un articulo cu a sali publica dialuna 19 di maart ultimo den un matutino local, bou di e titulo "Piscadonan na Hadicurari ta sinti cu Gobierno ta laga nan na caya".

Den dicho articulo ta ser treci padilanti cu piscadonan di Hadicurari lo ta malcontento cu cierto desaroyonan relaciona cu nos proyecto di Clubhuis. E proyecto aki ta encera renobacion di e piso ariba na Centro Hadicurari pa transforma esaki den un Clubhuis pa tur nos piscadonan di Aruba. Meta di e proyecto aki ta hustamente pa bin cu un luga unda piscadonan hunto cu nan famia y amigonan por pasa un rato agradabel, na unda ta sirbi bebida y cuminda na prijs local/cruiyo. Primeramente nos ta desapropa cu esnan tras di e articulo ta purba hinca e discusion den un esfera politico. Nos como fundacion no t'ey ni pa haci politica ni pa hiba discusionnan politico den prensa, pero nos t'ey solamente pa traha na interes general di henter comunidad di piscadonan aki na Aruba.

Nos ta lamenta tambe cu esnan tras di e articulo ta purba bruha tera door di trece informacionnan incorrecto den prensa. Nos tin indicacionnan fuerte cu ta trata di e mesun grupo cu den pasado tawata interesa pa huur e localidad situa na e di segundo piso di Centro Hadicurari pa opera esaki como un restaurant. Y awor nan ta purba crea e impresion cu nan ta papia na nomber di piscadonan di Hadicurari, siendo cu nan mes no ta ni piscado di Hadicurari, pero ta mas interesa pa defende nan propio interesnan particular.

Pues e grupo aki definitivamente no por y no ta papia na nomber di piscadonan di Hadicurari. Ultimo siman nan aki nos tawatin conversacionnan cu diferente piscado di Hadicurari y e señal cu nos a bin ta haya ta cu, mescos cu nos, nan tambe ta impaciente pa motibo cu e proyecto di renoba-

cion/reconstruccion di e localidad en cuestion ta tumando mas tempo cu a premira na inicio di e proyecto na september 2011. Motibo di e tardansa aki ta cu e contratistanan a confronta diferente contratiempo cu tawata fuera di nos alcance. N'e momentonan aki nos ta den e fase final di e proyecto. Proximamente nos di directiva di FCPH lo invita tur piscado di Hadicurari pa un reunion informativo regular pa asina entre otro informa nan encuanto progreso di e proyecto di nos Clubhuis y tur nos plannan pa cu esaki. □



Cede di Fundacion Centro di Pesca Hadicurari (FCPH)